

REPUBLIKA E KOSOVËS - REPUBLIKA KOSOVA - REPUBLIC OF KOSOVA
KOMUNA JUNIK - OPŠTINA JUNIK- MUNICIPALITY JUNIK

RREGULLORE PER RREGULLIMIN E PËRDORIMIT TË PIJEVE ALKOOLIKE NË LOKALET PUBLIKE

Në bazë të nenit 22 paragrafi 1 pika 3 të Statutit të Komunës së Junikut, neni 12.2 shkronja (c) e Ligjit Nr.03/ L-040 për Vetëqeverisjen Lokale, Kuvendi i Komunës së Junikut në mbledhjen e mbajtur më: ----- miratoi këtë:

(Draft): RREGULLORE

**PER RREGULLIMIN E PËRDORIMIT TË PIJEVE ALKOOLIKE NË
LOKALET PUBLIKE**

Neni 1

Akronimet dhe Definicionet

DEZH - Drejtoria e Ekonomisë dhe Zhvillimit;

PK - Policia e Kosovës;

GJKK - Gjykata Komunale për Kundërvajtje;

LEJE - Nënkupton lejen për shitjen dhe përdorimin e pijeve Alkoolike;

Pije Alkoolike –Nënkupton pijet me përmbajtje të alkoolit si rakia, verërat , birrat etj;

Lokal Afarist - Nënkupton objektin apo hapësirën punuese ku ushtrohet veprimtaria;

Person Juridik - Nënkupton Shoqërinë aksionare, Shoqërinë me Përgjegjësi të Kufizuar, Ndërmarrjen Publike, Organizatën dhe Asociacionin tjetër të Regjistruar në Regjistrin e Bizneseve;

Person Fizik - Nënkupton individin ose personin Fizik si pronar i ndërmarrjes së regjistruar si biznes Individual;

Autoritet Gjegjës - Nënkupton organet e autorizuar për mbikëqyrjen në baze të kësaj rregulloreje si dhe dispozitave të veçanta që rregullojnë këtë lëmi.

Neni 2.

Dispozitat e përgjithshme

Me këtë rregullore përcaktohet organi kompetent për dhënien e Lejes për shërbimin me pije alkoolike, lejimin dhe përdorimin e pijeve alkoolike në lokalet afariste, si dhe procedurat dhe kushtet për dhënien e Lejes.

Neni 3.

3.1 Të gjitha lokalet afariste publike të cilat në veprimtarinë e tyre e kanë edhe shërbimin me pije alkoolike, në baza të kësaj Rregulloreje janë të obliguara të kenë Lejen për përdorimin e pijeve alkoolike në ato lokale.

3.2 Leja për përdorimin e pijeve alkoolike jepet nga organi kompetent komunal në baza vjetore.

Neni 4

Kushtet dhe mënyra e dhënies së Lejes

4.1 Sipas kësaj Rregulloreje organ kompetent për dhënien e Lejes për përdorimin e pijeve alkoolike në Lokalet Afariste është Drejtoria e Ekonomisë dhe Zhvillimit.

4.2 Në afat prej 15 ditëve nga dita e parashtimit të kërkesës për pajisje me Leje, organi i cekur në paragrafin **4.1**, është i obliguar që parashtruesit të kërkesës t'ia lëshoj Lejen përkatëse për shërbimin dhe përdorimin e pijeve alkoolike, në pajtim me dispozitat e kësaj Rregulloreje.

Neni 5.

Për dhënien e Lejes për pije alkoolike lokalet afariste duhet t'i plotësojnë këto kushte:

- 1.** Të parashtrojnë kërkesë për pajisje me leje për lejimin e përdorimit të pijeve alkoolike;
- 2.** Të ketë të regjistruar biznesin përkatës;
- 3.** Të paguajnë taksën komunale dhe atë:
 - a)** në lartësi prej 20 € për dhënien e lejes për shitjen dhe përdorimin e pijeve alkoolike për motele dhe hotele dhe,
 - b)** në lartësi prej 10 € për dhënien e lejes për shitjen dhe përdorimin e pijeve alkoolike për kafeteri, bare, restorante, qebaptore, dhe lokalet tjera në të cilat lejohet konsumimi i alkoolit.

Neni 6.

Lejen për shërbimin dhe përdorimin e pijeve alkoolike mund ta kërkojnë: hotelet, motelet, kafeteritë, baret, restorantet, qebaptoret, dhe lokalet e ngjashme të kësaj natyre.

Neni 7

Nuk lejohet përdorimi dhe shërbimi me pije alkoolike në byrektore, ëmbëltore, kioske dhe lokale tjera të cilat nuk janë të regjistruara për ushtrimin e kësaj veprimtarie.

Neni 8

8.1 Rreptësisht ndalohet shërbimi i të miturve me pije alkoolike.

8.2 Obligohen të gjitha lokalet afariste të cilave iu është dhënë leja për shërbimin dhe përdorimin e pijeve alkoolike që në vendin e dukshëm të vendosin mbishkrimin me këtë përmbajtje: **“ndalohet shërbimi me pije alkoolike i të miturve”**.

Neni 9.

Gjatë organizimit të manifestimeve të ndryshme në vende të hapura, subjektet afariste janë të obliguar që t’iu përmbahen të gjitha dispozitave të përcaktuara në këtë rregullore për shërbimin me pije alkoolike sikurse në lokale të mbyllura.

Neni 10.

Marrja e Lejes

10.1 Lokali i cili posedon lejen përkatëse për përdorimin dhe konsumimin e alkoolit, në të cilin në mënyrë të vazhdueshme prishet rendi dhe qetësia publike, dhe kjo paraqitet si pengesë për objektet përreth, gjegjësisht i cili dështon në mbajtjen e rendit dhe qetësisë publike gjatë orarit të punës, ose lejon aktivitete të palejueshme do t’i merret Leja për përdorimin e pijeve alkoolike për atë vit kalendarik.

10.2 Kërkesën për marrjen e Lejes për shkaqe të cekura më lartë mund të parashtrijnë: PK –ja dhe Inspektorët përkatës Komunal.

Neni 11.

Vendimin për marrjen e Lejes në bazë të kërkesës së organit nga paragrafi **10.2**, e merr organi kompetent i cili e ka dhënë Lejen për përdorimin e pijeve alkoolike sipas kësaj Rregulloreje.

Neni 12.

Masat ndëshkuese dhe gjobat

12.1 Organet e inspektoratit komunal janë të obliguara që të mbikëqyrin zbatimin e kësaj Rregulloreje dhe të ndërmarrin masa adekuate në pajtim me këtë Rregullore.

12.2 PK-ja (Policia e Kosovës) është e autorizuar dhe mund të mbikëqyrë respektimin e dispozitave të kësaj rregulloreje, dhe për këtë ta njoftojë inspektoratin komunal për çdo parregullsi të hasur dhe të kërkojë ndërmarrjen e masave adekuate.

12.3 Lidhur me aktivitetin nga paragrafi 1 i këtij neni, mund të ndërmerren masat dhe veprimet përkatëse sanksionuese nga dënimi mandator, inicimi i procedurës kundërvajtëse, dhe shqiptimi i masave tjera ndëshkuese, gjobave e gjerë te marrja e Lejes së punës ose Lejes së përdorimit të pijeve alkoolike.

Neni 13.

13.1 Dënimi mandator në lartësi prej 50 €, do t'i shqiptohet pronarit të subjektit afarist për mos përmbajtje të dispozitave nga nenet 8 dhe 9, të kësaj Rregulloreje, në rast të refuzimit të pagesës ngritët procedura kundërvajtëse dhe lartësia e dënimit është 70 deri në 100 €.

13.2 Me gjobë prej 100 € deri në 200 €, do të dënohet për kundërvajtje Subjekti afarist i cili nuk disponon Leje për përdorimin e alkoolit konform dispozitës së nenit 6 dhe 7 të kësaj Rregulloreje.

Neni 14

14.1 Pagesa e të gjitha dënimeve mandatore behet me rastin e shqiptimit të dënimit, në të kundërtën ngritët procedurë për kundërvajtje nga inspektori komunal.

14.2 Në rast se pronari i subjektit afarist nuk bënë pagesën e dënimeve në afatin e përcaktuar në paragrafin **14.1**, ndaj tij do të iniciohet procedura kundërvajtëse, pranë Gjykatës Komunale për Kundërvajtje në Deçan.

Neni 15

Të gjithë subjektet afariste të cilat në lokalet e tyre shërbehen me pije alkoolike, janë të obliguara që në afat prej 30 ditëve, nga dita e hyrjes në fuqi të kësaj Rregulloreje të parashtrojnë kërkesë për tu pajisur me Leje përkatëse.

Neni 16

Mjetet e arkëtuara nga shqiptimi dënimeve përkatëse në kuptim të dispozitave paragrafët **13.1, 13.2** do të derdhën në Buxhetin Komunal.

Neni 17

Në implementimin e kësaj Rregulloreje përveç organeve kompetente Komunale, do të angazhohen dhe organet e tjera kompetente, Policia e Kosovës dhe organi gjyqësor për kundërvajtje.


Neni 18

Kjo rregullore hyn në fuqi ditën e miratimit të sajë nga Kuvendi i Komunës së Junikut.

Datë: 30.01.2012
Junik



Kryesuesi i Kuvendit Komunal


Sinan Gacaferi